

ES CHLYSES TAGEBUECH VOMENE PITBULL USEM TIERHEIM ...



Tchicca's Tagebuech vor erste Wuche...

Sunntig, 26.03.2006 - d'Übernahm...

I bi ja so öppis vo ufgregt gsi a däm Namitag; bi grad mit mim Fründ, em „Bou“ im Uslouf gsi wo es silbrigs Outo isch zueche gfahre. Mir si beidi interessiert a Zuun ga luege wär da chunnt. Es si 4 Lüt usgstiege und eini dervo isch sofort zu üs cho und het üs fröidig begrüesst. Si ischmer bekannt vorcho u si hetmer när o gseit si sig die womer am Ziischtig vorhär so lieb „ciao bella u bis bald“ het gseit...






Gly drufabe heisi mi usem Uslouf gno u hei wölle ga spaziere. Wo si no 4 anderi Hünd usem Outo usglade hei, bini fasch nümme z'brämse gsi. Hey, 2 vo dene si ja ou letschte Ziischtig mit mir im Uslouf gsi, nämlech dr Kyros (dr Russisch Terrier) und dr Rico (Cairn Terrier)! So simer alli zäme ga loufe. I ha zoge wiene Irri ar

Leine, ha scho lang nümme chönne e nöii Umgäbig ga beschnüffle! Vor luuter Herrjesses u zieh hani müesse chötzle, aber es isch toll gsi.



Womer wieder ufem Hof vom Herr Binggeli si gsi, heisi no müesse Papierchram erledige. Ha villedich schön gstuunet wosi mi när i das silbrige Outo hei iiglade u mit gno hei! Juppeh, wohäre geits ächt? Bi sehr brav gsi und gly ou abgläge während dr Fahrt.

Scho gly simer aacho u Talitha hetmer erklärt, das sig dr Ort womer düre Tag albe sigi (ds Büro bide Eltere vo ihre). Es het e grosse umzühnte Rase mit Büsch dirt. Ha sofort alles müesse absueche u hami anschliessend gnüsslech im Gras gwälzt. Mir hei alli öppis chlyses z'ässe becho u d'Lüt hei es Kafi trunke.




När simer wieder mitem Outo witergahre. Dr nächst Stopp isch ar Aare ds Stäffisburg gsi womer nomau alli zäme si ga loufe. Talitha hetmi ar Flexi-Leine gha u i bi sehr brav gsi.

Nach knapp 10 Minute Outofahrt simer bime Huus aacho, womer alli ine Lift hei müesse. Ha mi super benoh u ha gar nüt derglyche tah. Talitha het gmeint i kenne ds Liftfahre äüä scho. I ihrer Wohnig hani natürlich jedes Zimmer genaustens müesse ungersueche. Si heimi alli geduldig lah mache. Talitha isch



uf Balkon ga höckle u hetmi beobachtet. Woni alles usgiebig beschnüfflet ha gha, bini zuere u bire mit mine Vorderfüess uf d'Schoss ufe gstande, hare mi Chopf ufe Buuch gleit u ihre dr Arm abgschläcket um ihre ds säge wie dankbar dasi bi - si isch zu Träne grüehrt gsi!

Was när isch cho hani nid sooooo luschtig gfunde. Si hetmi id Badwanne gstellt! Wääääk! Hami zwar relativ still ghäbt - si het ämu gmeint i sig ganz e Gueti. Ds abrubble mitem Tuech hani derfür mega gnosse, so schön. Bi när wiene Wildi dür d'Wohnig grennt u ha richtig dr Clown gspielt ☺. Will i soviel ha trunke wäge dere ganze Ufregig hani 2x müesse bisele u ha doch nid gwüsst wieni das mues säge. Talitha isch nid bös gsi uf mi, si het gseit si sig sälber schuld ☺.



Ds Znachtässe hani ganz ellei ir Chuchi becho. Das isch o guet so gsi wiu miner Hundekollege ziemlech gierig ässi und ig sehr langsam. Loufe o geng wieder vom Napf wäg, bi no chly unsicher gsi.

Bevor dasmer si ga pfluuse simer no ufenes chlyses Rundeli ga loufe. Da ig scho vorhär em Kyros sis Bett (es grösses Chüssi mit Styroporchügeli drinne -



mmmh, wohlig!) beschlagnahmt ha, het Talitha das riese Chüssi näbe ihres Bett tah. Zwüschine het si mir immer wieder ihri Hand abeghäbt um mir ds zeige, dass si no da und alles ok isch. U so bini die ganzi Nacht sehr ruhig gsi und ha töif, töif gschlafe...

Mäntig, 27.03.2006 - 1. Tag...

Woni bi ufgwachet hani als ersts mi Chopf ufs Bett gleit u er Talitha d'Händ abgschlabberet. Es isch alles so ruhig gsi, ganz anders als im Zwinger vorhär, ha die Stilli sehr gnosse u ha guet pfluuset...u gschnarchet! ☺

Füre Morgespaziergang simer i Wald gfare. Talitha het sehr grosses Vertroue i mi gha und hetmi scho ds 1. Mal ohni Leine lah loufe! Uiiiiii, ha ig Fröid gha! Bi nur öppe 5 Meter vo ihre furt gange u jedes Mal weni wieder zu ihre zrüg bi, hets es feins Gutzi gäh. Das hani gaaaanz schnäll usegfunde! ☺

När simer ga „schaffe“ - ou dirt hani natürlech als ersts müesse alles ga uskundschaftete. Talitha het es paar Mal müesse gschäftlech wäg und hetmi jedes Mal hurti mitem Outo mitgnoh. I ha sehr brav ellei gwartet während dene Churzufenthalte.

D'Eltere vor Talitha hei ja no so e interessant Chatz ☺ - aber i ha grad müesse lehre, dass die tabu für mi isch. Si hetmer erklärt dass die uralt isch u gar nüt meh ghört. Also löhmer die halt lah si...



Am Namitag simer miter „Hundefründin“ Marlène vor Talitha ga loufe. So bini mit 4 andere Kollege ungerwägs gsi, nämlech mitem Miro, Hombre, Kyros und em Rico. Das het de Spass gmacht! Später simer no imene Hundefuetterlade gsi. I ha müesse Halsbänder aaprobieren, aber er Talitha het kes gfalle für mi. Isch aber trotzdem interessant gsi, bi zimlech überwältiget gsi vo dene viele verschiedene Gschmäcker! ☺

Am Abe het Talitha ds BH-Training abgeit wäge mir - si het gfunde dass ig jetzt meh Zyt bruchi als dr Kyros. Derfür het si üs für ds T.T.E.A.M. Training aagmaldet, si het gemeint dass würd üsi Beziehig festige und mir meh Sicherheit gäh - bi ja gspannt! ☺ Mir si trotzdem schnäll ufem Hundeplatz gsi. I bi sehr ufgregt gsi u hami churzerhand us mim Halsband zwängt u ha es paar Rundine dür d'Lüt und Hünd dräiht! Uiiiiii, das het e Ufruehr gäh! ☺ Bi fasch nid ds bändige gsi u ha alli Hünd wölle animiere mit mir ds spiele. Blöderwiis sie die aber alli ar Leine gsi...Das isch e Uftritt gsi! ☺ I gloube teilne Lüt isch also ds Bluet im Gsicht gfröre, so nachem Motto: Hilfe, dr Kampfhund isch los! ☺ ☺ ☺ Womer wieder deheim si gsi isch Talitha zerscht Mal ohni mi churz us dr Wohnig gange (si isch churz id Wöschchuchi abe). Bi sehr brav gsi u ha ruhig gwartet - miner andere zwöi Kollege si ja ono da gsi.

Ziischtig, 28.03.2006 - 2. Tag...

Guete Morge Talitha! ☺ Wo dr Wecker het glüetet bini sofort mitem Chopf und mine Vorderfüess ufs Bett ufe u ha mi langsam ufe gschliche. Si het scho chly müesse grinse, aber es het gwürkt, si isch schnäll ufgstande! ☺

Ufem Morgespaziergang hani müesse es „assi“ lehre. Bevor si mi albe vor Leine laht muesi das immer mache und när folgt es „attends“ und „luege“. När darfi springe! Will Talitha immer no nid weiss wie si mir söll säge, heisse ig im



Momänt no „chehre“ und „zu mir“ - aber so heisse miner Kollege äüä o, si gö ämu o immer zu ihre. ☺

Im Büro bini nächt ruhig gsi, „verfolge“ zwar Talitha immer we si ufsteit überall häre, o wes nume uf Toilette isch! ☺ Am Mittag heimer alli sones komisches Ding (Ochseziemer) becho; ha überhoubt nid gwüsst wasi mit däm söll?! Talitha hetmer ne immer wieder gäh und erklärt i chönn dä ässe ☺ - gly hani kapiert dass das fein isch uf so öppisem desume z'koue!

Am Abe simer mitem Markus und em Micky (Westiehündin) ga loufe. I ha ds Micky so lang animiert, bis sie ändlech mit mir het ghulfe

spiele. Uiii, das het gfägt! Mir hei Renn- und Verfolgigsspieli gmacht und will sie nid so schnäll isch wie ig, het si immer Abchürzige under Bänkli und ähdlech gno. Mir hei so wild tah und si richtigi Dräckspatze gsi, es hei alli Fröid gha. ☺ Dr Kyros und dr Rico ignoriere mi mehrheitlech, irgendwie wei die zwe nid so nächt mit mir öppis ztue ha.

Süsche fühllemi scho nächt deheime, wälzemi wohlig ufem Flokati-Teppich ir Stube und mini absoluti Lieblingsstellig isch wenn Talitha ufem Sofa höcklet und ig ihre mini Vorderbei und dr Chopf ufe Schoss cha lege! Weni aber de es Grüsche ghöre woni no nid kenne, bini sofort wieder hällwach u gibe aa wiene Wältmeister...



Midwuch, 29.03.2006 - 3. Tag..

Ändlech e Name! Hüt am Morge isch Talitha ufgstande u het spontan gseit, ig heissi itz „Blade-Jamila“. „Blade“ will si immer het gseit dass ihre nächst Hund eso wird heisse und „Jamila“ will ig sone schöni und eleganti sig (das heissi uf arabisch „Schönheit“). Am Morge hani es paar Mal ar churze Leine müesse loufe, das geit scho rächt guet, vor allem hani schnäll müesse lehre, dass mer dirt nid geng söll dri biisse ☺. Äbeso muesi jede Tag ds „halt“ und „laisse“ zeige, sig das mit Spielzüüg oder ufem Spaziergang mitemene Stücke.

Am Vormittag isch d'Schwöschter vor Talitha mit ihrem 3 ½ jährige Bueb Robin üs ids Büro cho bsueche. I bi sehr brav und lieb gsi - bi ganz glasse und cha guet mit Chind umgah.



Am Namitag simer i „Dog + Cat Shop“ uf Thun - Talitha het e Grossiichouf gmacht. Ha es schöns Halsband, es feudals, weichs Bettli und es mega interessants Spielzüüg becho! ☺



Ufem Spaziergang am Abe hani miter Choca, er Cairn Hündin vor Talitha's Eltere chönne spiele. Im Wald go ds loufe isch für mi natürlech ds höchste! I tuemi sehr stark am Kyros orientiere, luege aber immer wieder wo Talitha isch. Räge hingäge findeni unnötig ☺.




Am Abe isch er Talitha ihri Fründin mi für 2 Stund cho hüete, si het ane Sitzig müesse und mi nid chönne mitnäh. Wo si wieder isch heicho bini fasch usgflippt vor Fröid, ha aber während ihrer Abwäseheit brav gwartet. Ds Fuetter hani hüt übrigens mit allne andere zäme becho; das geit tiptop und i frisse jetzt ou viel schnäller...

Donnstag, 30.03.2006 - 4. Tag...

Hüt het dr Tag sehr ruhig aagfange. Mis nöie Bettli woni ha für im Büro ha becho isch mega bequem. Trotz de Telefon- oder andere Grüsche schlafeni inzwüsche töif und fest we Talitha am schaffe isch. Zwüschine gani albe zu mine Hundekollege wo ganz gspannt ir Chuchi vor Talitha's Muetter ufenes Häppli warti. Ga aber immer wieder zrüg is Büro ga luege ob mis Froueli no da isch ☺. Ufem Morgespaziergang heimer wieder öppis nöis g'üebt, nämlech ds „terre“. Ha gfunde i sött mis schöne, nöie Halsband no grad iiweihe und ha mi imene Fuchsdräck gwälzt! Talitha hets glasse gno u het gmeint itz heig si scho zwöi so Grüsle ☺.

Inzwüsche hani sehr Fröid weni e Kauknoche o.ä. bechume u weiss genau wieni dä muess bearbeite. Ds Frässe gitmer mir zäme mit mine Kollege u das geit super. Jede laht dr ander ruhig la fertig ässe u när gö alli no die andere Fuetterbecki ga



usschläcke!

Am Aabe simer mitere Hundekollegin vor Talitha ga loufe. Es si e Golden-, e Labrador und e X-Mechelaar-Rüd derbi gsi. Mitem letschte hami sehr guet verstande will er es ähdlechs Temperamänt wie ig ha. Mir si schier unermüedlech enang nache grennt und hei ume glych Stücke gfightet! ☺

Uf mi Name „Blade“ loseni scho rächt guet. Wills het grägnat hetmi Talitha när ganz guet mitemene Badtuech abtröchnet - si het so müesse lache will i geng so grunze vor Wöhli bim tröchne ☺...



Frytig, 31.03.2006 - 5. Tag...

Ar Leine ziehni scho nümme wiene Ochs, u we Talitha mir rüeft, chumi schnäll und freudig zrugg wills immer feini Gutzis bi ihre git. Sit i nümme so Stress ha, hani überhopt ds Frässe allgemein sehr gärn becho und warte jewiils scho zimlech „giggerig“ bis es öppis git ☺.

A Spazierrhythmus hani mi sehr guet gwöhnt, i weiss genau um weli Zyt dasmer use göh und es isch o kes „Unglück“ meh ufem Teppich passiert ☺.



Dr Kyros het hüt sogar mit mir „stäckezieh“ gspielt. Är isch sowieso mis grosse Vorbild u i luege geng was är macht u tue ihm viel nache mache. U wes Richtig Huusiigang geit, gumpeni wienes Rössli will i so Fröid ha...



Samstag, 01.04.2006 - 6. Tag...

Am Morge het Talitha sones komisches Ding füre gno wo e furchtbare Lärme het gmacht (Stoubsuger). Hami grad uf ds Bett verzoge. Si hetmer erklärt dass das nid eso schlimm sig u i bi när immerhin scho id Nächi das Ding ga beschnuppere. Am Namitag simer miter Talitha's Fründin und ihrne Chind ga loufe. Si hei alli uu Fröid gha a mir und ig o. Finde die Chind so lieb und es fägt mit dene! Ir Wohnig bliebeni scho afe 10 Minute ruhig ellei (mitem Rico und em Kyros) we Talitha churz Sache geit go erledige. U e guete Wächter sig ig o! ☺

Sonntag, 01.04.2006 - 7. Tag...

Hüt simer mitem Conny (er Fründin vor Talitha), ihrer Familie und er „Hundefründin“ Marlène mit ihrne beidne Hünd uf dr Thuner Allmänd ga loufe. Es machtmer so fest Spass weni mite andere um d'Wett darf renne! Die sogenannte Wuchenänd gniesseni sehr - da het Talitha bsunders viel Zyt für üs. Es isch sowieso sensationell ruhig und alles isch so glasse obwohl i jede Tag öppis mues lehre oder mirs ämu tüe wiederhole und festige! Bi sehr wohl i mim nöie Läbe u zeige das weni mi wohlig ufem Teppich wälze, verusse wienes sturms Wäspi Rundine dräihe oder er Talitha fasch i Schoss schlüüfe... Life can be so beautyfull!!! ☺



Resumé...

D'Blade het sech extrem schnäll a ihri nöii Umgäbig gwöhnt und ihres nöie Deheim sofort als das akzeptiert. Scho nachem 1. Tag het si bereits gwüst weles Outo dass „ihres“ isch, isch wie sälbverständlech dirt iigstiege und het dr Huusiigang ellei gfunde. Sie het scho am erste Tag mit mir gspielt und isch i allne Belange sehr offe und ufnahmefähig gsi. Was si nid so gärn het si luuti Grüüsch wie Lastwage o.ä. wo si nid so kennt. Ou het si sehr Respäkt u teils sogar Angscht vorem Haarfön und em Stoubsuger. Si het aber sehr schnäll Vertraue zu mir gfasst u dür das hani ihre die Angscht immer wie meh chönne näh.

I ds bestehende Rudel hetsi sech perfekt iigfüegt; si het sech sofort nachem Alpha Tier, em Kyros orientiert und het dr Rico i sire Rolle „chum-mer-ja-nid-aa-süs-chlepfts“ akzeptiert. Si het es absoluts subers und genials Sozialverhalte. Ufem Spaziergang isch si gägenüber anderne Hünd ufgschlosse u neugierig, wiicht aber dene us wo nid fründlech si oder ordnet sich sofort unter.

Nach 4 - 5 Tag het d'Blade afa lehre was „luege“ und lehre überhaupt isch - si het sehr schnäll begriffe wie me zumene Gutzi chunnt ☺ - und het e gueti Uffassigsgab. Nachere Wuche tuet si scho d'Wohnig u chly später ds Outo bewache; si het dirt natürlech o gueti Lehrer gha! ☺

Jede Tag üebemer im Büro dr richtig Umgang mit dr Chatz vo mine Eltere - es fällt ihre scho chly schwär die müesse ds lah si, aber nach knapp 2 Wuche mues niemer meh es Oug druf ha wesech die zwöi ir Wohnig oder im Garte begägni - es isch erstuunlech!



Ihri ufknabberete Pfote hetsi scho nach de erste Tag lah si - es isch es unbeschriiblechs Gfühl wome het wome se beobachtet u cha feststelle, dass langsam aber sicher ihri Seele heilt...!

Nach ca. 1 $\frac{1}{2}$ Wuche simer ds erste Mal zäme ines Restaurant. Anschiinend het si ou das absolut nid kennt, hetsech $\frac{3}{4}$ Stund hin und här bewegt und Lüt verbället wo si inecho. Scho nachem 2. und 3. „Beize-Bsuech“ hetsech d'Blade nach 5 Minute schön ruhig ufe Bode zu mine Füess gleit ☺.

Nachere guete Wuche Ignoranz gägenüber dr Blade vo mine 2 Buebe het plötzlech dr Kyros mit dr Blade afa spiele - är het se ganz bestimmt iiteilt u ihre ufene spielerischi Art ihri Gränze ufzeigt. Si bliibt nach dere Zyt o afe sehr ruhig und still 1 Stund ellei dehome. I danke d'Aawäseheit vode 2 Jungs gäbe ihre e gueti Sicherheit. Weni hei chume chunnt si komischerwiis geng usem Schlafzimmer und uf mire Hälfti vom Bett isch e warmi Tuehle ☺.



Am Morge steit si jewiils als ernsts uf dr Matte we dr Wecker geit, leit ihre Chopf ufe Bettrand u wartet nume no druf bis i säge „isch guet, chum ufe“ u d'Bettdechi chly lüpfte, u scho machts schwupps, isch d'Blade wiene Schlange ou under dr Dechi ☺. Si het es ungloublechs Nachholbedürfnis was ds Schmuse, Wärmi und Körperkontakt aabelangt!

Nach knapp 4 Mönet cha si es „Sitz“ (assi), es „Liege“ (couche), es „Wart“ (attends) - es korräkts „Platz (terre)“ für ds Hündele, es „Steh“ (debout) unes „Gib Laut“ (aboie) üebemer no. Si louft meistens ohni gross ds zieh ar normale Leine und laht ou frömdi Chatze unterwegs lah si (sofern ig se ender gseh! ☺). Si isch nach und nach meh ids Wasser und isch am 25.07.06 ds erste Mal



richtig gschwumme und e Stücke ga rette! I nimese überall mit häre um mögelleicht viel Nöis und Abwächslig i ihres Läbe ds bringe - si isch o scho mit cho wandere u mitem Gondeli gfare...

Churzum: es wird mir immer es Rätsel si wieme ufene sone Troumhund wo so schnäll und gärn lernt, freiwillig cha verzichte!!!

...UND: KAMPFHUND???

WOHL EHER KAMPFSCHMUUSER!!! ☺



...ihri Lieblingsplätzli ☺...

April / Mai 06





...Wanderig uf dr Sillere,
inkl. Gondelifahrt! ☺...

Juli 06





...itz macht sogar
Wasser Spass! 😊...



August 06





...Penntüte "Blade" ☺...





...absolutely
no comment...

Oktober 06



August 06



Mai 06





Juli 06

...Boot fahre
fägt!...





November 06